

Mos quedamos sin luengas

O pasato 18 d'otubre a BBC se feba leco de que mos semos quedando sin de luengas. Desgraziadamén en Aragón ya fa tiempo que en benimos parando cuenta.

Fa bellas 20 añadas que os lingüistas predizieron que á ra fin d'iste sieglo bentenoprimerio arredol d'o 90 % d'as luengas d'o mundo abrán disparexito si no se fa por emparar-las e protexer-las.

A cruda reyalidá ye que cuasi o 95 % de toda ra chen d'o mundo no charra que un radito 6% d'as que bi'n ha, e iste perzentache encara leba camín d'ir enamplando-se encara más si paramos cuenta que a estendencia ye que as comunidaz alpartatas salgan ta atras partis d'o mundo do se presupone que ban á bibir millor, cosa que fa que, como muito en dos chenerazions, a luenga que leban con ers siga trusquita por belatra más charrata e que se troba drento d'ixe 6 %.

O poliglota francotunezino Claude Hagège diz que os idiomas son bella cosa más que un saco de parolas, son un organismo bibo que remata definindo una cultura e, por ixo, cuan una luenga s'amorta, tamién s'amorta ra cultura que la susteneba.

O etnologo M. Paul Lewis creye que si a chen prenzipia á pensar que a suya luenga no ye útil, allora tamién beyerán como inútil a suya propia identidá. Por ixo, si os pais díxan de transmitir a suya luenga á os fillos, rematará por crebar-se a conisión entre lolos e nietos e as baluras tradizionals d'una cultura.

Con o esfuerzo d'a comunidá cualsiquier luenga puede rebiscolar e rechitar e si no, que le'n digan á o ebreu u o galés.

Calerba que en Aragón se pensase onradamén e funda en isto e que toz fesen un poder por dar una oportunidá á l'aragonés, á ista chiqueta e quiesta luenga nuestra.

Podemos comprebar que bi ha boluntá politica e bien de diners publicos ta muitas cosas, mesmo ta intreses e destinatarios pribatos. Por ixo ye difízil entender por qué l'aragonés se troba como se troba.